

河源紀略

傅增湘題

欽定河源紀畧卷二十九

紀事四

招哈和屯

按招哈和屯卽古交河城車師前王所居今其地距京師八千四百餘里招哈河出其北源出金嶺中分道南流環城左右而南注至城南折而西南流二十里入沙磧招哈和屯爲羅布淖爾北境伏流來會之水所經之地今紀其事如左

漢書西域傳車師前國王治交河城河水分繞城

下故號交河去長安八千一百五十里戶七百口  
六千五十勝兵千八百六十五人西南至都護治  
所千八百里地節二年車師叛漢遣侍郎鄭吉  
等發城郭諸國兵萬餘人自與所將田士千五百  
人共擊車師攻交河城破之

後漢書西域傳車師前王居交河城河水分流繞  
城故號交河去長史所居柳中八十里東去洛陽  
九千一百二十里領戶千五百餘口四千餘勝兵  
二千人建初元年酒泉太守段彭大破車師於交

河城

魏書帝紀世祖太延元年車師國遣使朝獻尋以  
大帥車伊洛爲前部王

魏書西域傳車師國一名前部其王居交河城去  
代萬五十里其地北接蠕蠕本通使交易世傳遣  
使朝獻詔行人王恩生許綱等出使恩生等時度  
流沙爲蠕蠕所執恩生見蠕蠕吳提持魏節不爲  
之屈後世祖切讓吳提吳提懼乃遣恩生等歸初  
沮渠無諱兄弟之渡流沙也鳩集遺人破車師車  
伊落遣使求救下詔撫慰之開焉耆倉給之正平  
初遣子入侍自後每使朝貢

唐書西域傳高昌王都交河城漢車師前王庭也  
侯君集爲交河道大總管伐高昌中郎將辛獠兒  
以勁騎夜逼其都軍進填隍引衝車飛石如雨城  
中大震智盛謁軍門請改事天子君集諭使降使  
未屈薛萬均勃然起曰當先取城小兒何與語麾  
而進智盛流汗伏地曰惟公命乃降  
又地理志交河郡交河縣縣北八十里至龍泉館  
又北入谷一百三十里經柳谷度金嶺經石會漢  
戍至北庭都護府城  
文獻通考君集以兵傳城智盛降以交河城爲交

河縣

宋史高昌傳王延德使高昌師子王邀延德至其

北庭歷交河州

土爾番

謹按土爾番卽吐魯番爲唐高昌縣安樂城遺址今其地距京師八千四百餘里土爾番河發源其西金嶺經土爾番城西南流土爾番爲羅布淖爾東北伏流來會之水所經之地合紀其事於左

康熙五十九年八月散秩大臣阿喇納率兵至土

爾番土爾番部阿克蘇爾坦及總管酋目沙克札  
拍爾等率衆歸降六十年靖逆將軍富寧安奏吐  
爾番回人因策妄阿喇布坦徙其衆於哈喇沙爾  
相率逃歸準噶爾率衆來追回人復併力擊退之  
請兵救援時議以策妄阿喇布坦未滅若納其降  
須屯兵守護恐糧運艱難

詔以回人旣已歸降卽係我人民

命派兵二千往撫其衆并駐劄以資防守策妄阿喇布坦  
遣兵來犯散秩大臣阿喇納侍衛克什圖等率師  
迎戰大敗之追捕數十里是冬以吐爾番駐師

命總督鄂海等前往經理墾田雍正八年以吐爾番回目  
額敏和卓屯田効力恭順可嘉入貢示給萬貫  
特旨褒賞十年十一月封額敏和卓爲札薩克輔國公十

二月

詔以吐爾番遠在邊境賊人不時侵擾瓜州土肥饒多水  
泉氣候和暖與回民舊住處風景相似地寬濶可  
開墾足資耕牧遂由塔勒納沁遷其衆於瓜州乾  
隆二十年吐爾番回酋莽噶里克率衆一千戶投  
誠二十一年以其屬衆編次旗分佐領封莽噶里  
克爲札薩克公尋以叛復降爲總兵傅魁所誘殺

以額敏和卓子素賚璫駐其地

周書帝紀明帝二年遣柱國寧蜀公尉遲回率衆

于河南築安樂城

文獻通考四夷考土魯番一名吐爾番本交和縣  
之安樂城城方三里

明史西域傳土爾番在和卓西百里去哈密千餘  
里嘉峪關二千六百里漢車師前王地隋高昌國  
唐滅高昌置西州及交河縣此則交河縣安樂城  
也宋復名高昌爲回鶻所據嘗入貢元設萬戶府  
永樂四年遣官使巴什伯里道其地以綵幣賜之

二十年其酋爲巴什伯里所逐走歸京師天子遣  
還故土洪熙元年躬率部落來朝宣德正統景泰  
天順間皆遣使入貢初其地微弱後哈喇和卓柳  
城皆爲所并成化九年據哈密城執王母奪金印  
分兵守之而去朝廷命李文等經畧無功而還宏  
治元年諭歸侵地不奉命復遣使貢禮官議薄其  
賞拘使臣四年以所據十一城及金印來歸厚賜  
之釋還所拘使臣六年復襲陷哈密巡撫許進等  
遣兵擊走之正德九年犯肅州嘉靖三年寇肅州  
掠甘州四年復寇肅州皆失利去七年賊黨雅蘭

率所屬來降自是勢漸孤部下各自雄長迄萬厯

朝遣使奉貢不絕和卓舊作火州巴什伯里舊作別失八里雅蘭舊作牙蘭今譯

改

### 哈喇和卓

謹按哈喇和卓為漢車師前國地魏晉以下并

為高昌國地唐置交河郡高昌縣地元曰哈喇

火者當作哈喇和卓明日火州當作和卓今其地距京師八

千三百餘里哈喇和卓河在城東二十里源出

金嶺西流入于地哈喇和卓為羅布淖爾東北

伏流來會之水所經之地今紀其事如左

雍正九年準噶爾賊衆侵擾土爾番攻魯克察克城四十餘日不下後以木梯三百攻哈喇和卓城堡回民悉力拒守殺賊甚衆大兵繼至賊聞風驚懼遺棄馬匹器仗及所炊熟食而遁十年閏五月賊人宰桑額爾克得松率兵二千分東西兩路復來犯喀喇和卓城叅將劉廷琰遊擊李英等分兵擊之賊敗走率師追勦而還乾隆二十四年準噶爾平定置屯田六千畝屯兵三百名管屯武職無定額

晉書張駿傳初戊己校尉趙貞不附于駿駿擊擒

之以其地為高昌郡

又呂光載記光以高昌雖在西陲地居形勝以子

覆為使持節鎮西將軍都督玉門以西軍事西域

大都護鎮高昌

隋書西域傳高昌國其都城周迴一千八百四十

步國內有城十八

唐書地理志西州交河郡領縣前庭本高昌寶應

元年更名

文獻通考唐平高昌以高昌為高昌縣

元史地理志西北地附錄哈喇和卓

舊作合喇火者今改正

明史西域傳和卓舊名火州今改正又名哈喇在柳城西

七十里土爾番東三十里卽漢車師前王地隋時爲高昌國唐太宗滅高昌以其地爲西州宋時回鶻居之嘗入貢元名和卓與安定曲先諸衛統號輝和爾置達爾噶齊監治之永樂四年五月命鴻臚丞劉特穆爾護巴什伯里使者歸因齎綵幣賜其王子哈散明年遣使貢玉璞方物十一年又來貢命陳誠李暹等以璽書文綺紗羅布帛往勞十三年冬遣使隨誠來貢自是久不至正統十三年復貢後遂絕其地城方十餘里東有荒城卽高昌

國郡漢戊己校尉所作

輝和爾舊作畏兀兒達爾  
噶齊舊作達魯花赤特穆

爾舊作帖木兒巴什伯里  
舊作別失八里今譯改

### 魯克察克

謹按魯克察克即漢柳中地戊己校尉城此因

名柳城後訛為柳陳又為魯陳魯克察克河發

源金嶺南麓西行經魯克察克城南旁嶺西流

而伏魯克察克為羅布淖爾東北伏流來會之

水所經之地今紀其事於左

康熙六十年土爾番回人歸誠因為準噶爾遷徙

相率逃歸移駐于魯克察克雍正九年賊率眾二

千餘人來攻其城圍四十餘日回民奮勇出擊殺  
賊數百人會將軍岳鐘琪合總兵張元佐等以兵  
三千援之賊望風卽遁倍道追之賊四散逸去兵  
抵魯克察克城下回目額敏和卓及老幼男女歡  
迎卽留兵一千駐之十年

詔額敏和卓率其衆移駐瓜州乾隆二十年準噶爾平定  
後復還居故地

漢書西域傳戊巳校尉屯田居車師故地校尉刁  
護病遣史陳良屯桓且谷備匈奴寇史終帶取糧  
食司馬丞韓元領諸壁右曲侯任商領諸壘相與

謀曰西域諸國頗背叛匈奴欲大侵將人衆降匈奴卽將數千騎至校尉府脅諸亭令燔積薪去校尉府數里正晨火難校尉開門擊鼓收吏士良等隨入遂殺校尉刁護止留戊己校尉城良等盡脅畧戊己校尉吏士男女二千餘人入匈奴單于以良帶爲烏賁都尉後三歲單于與莽和親莽遣使者多齎金幣賂單于購求陳良終帶等單于盡收四人及手殺刁護者芝音妻子以下二十七人皆械檻車付使者到長安莽皆燒殺之

資治通鑑漢明帝永平十七年謁者關寵爲戊己